

四庫全書

史部

欽定四庫全書

欽定國子監志卷五十五

藝文一

奏議附

元

論建學校疏

博果密

臣等聞之學記曰君子如欲化民成俗其必由學乎玉不琢不成器人不學不知道故古之王

者建國君民教學為先蓋自堯舜禹湯文武之
世莫不有學故其治隆於上俗美於下而為後
世所法降至漢朝亦建學校詔諸生課試補官
魏道武帝起自北方既定中原增置生員三千
儒學以興此歷代皆有學校之證也臣等今復
取平南之君建置學校者為陛下陳之晉武帝
嘗平吳矣始起國子學隋文帝嘗滅陳矣俾國
子寺不隸太常唐高祖嘗滅梁矣詔諸州縣及

鄉並令置學及至太宗數幸國學增築學舍至千二百間國學太學四門學亦增生員其書算各置博士乃至高麗百濟新羅高昌吐蕃諸國君長亦遣子弟入學國學之內至八千餘人高宗因之遂令國子監領六學一曰國子學二曰太學三曰四門學四曰律學五曰書學六曰算學各置生徒有差皆承高祖之意也然晉之平吳得戶五十二萬而已隋之滅陳得郡縣五百

而已唐之滅梁得戶六十餘萬而已而其崇重
學校已如此況我堂堂大國奄有江嶺之地計
亡宋之戶不下千萬陛下神功自古未有而非
晉隋唐之所敢比也然學校之政尚未全舉臣
竊惜之臣等嚮被聖恩俾習儒學欽惟聖意豈
不以諸邑人任官者常多蒙古人任官者常少
而欲臣等曉識世務以任陛下之使令乎然以
學制未定朋從數少譬猶責嘉禾於數苗求良

驥於數馬臣等恐其不易得也為今之計如欲
人材衆多通習漢法必如古昔編立學校然後
可若曰未暇宜且於大都宏闡國學擇蒙古人
年十五以上十歲以下質美者百人百官子弟
與凡民俊秀者百人俾廩給各有定制選德業
充備足為師表者充司業博士助教而教育之
使其教必本于人倫明乎物理為之講解經傳
授以修身齊家治國平天下之道其下復立數

科如小學律書算之類每科設之教授各令以
本業訓導小學科則令讀誦經書教以應對進
退事長之節律科則專令通曉吏事書科則專
令曉習字畫算科則專令熟嫻算數或一藝通
然後改授或一日之間更次為之俾國子學官
總領其事常加點勘務要俱通仍以義理為主
有餘力者聽令學作文字日月歲時隨其利鈍
各責所就功課程其勤惰而賞罰之勤者則升

之上舍情者則降之下舍待其改過則復升之
假日則聽令學射自非假日無故不令出學數
年以後上舍學生業有成就者乃聽學官保舉
蒙古人若何品級諸色人若何仕進其未成就
者且令依舊學習俟其可以從政然後歲聽學
官舉其賢者能者使之依例入任其終不可教
者三年聽令出學凡學政因革生員增減若得
不時奏聞則學無弊政而天下之材亦皆觀感

而興起矣。然後續立郡縣之學，求以化民成俗，無不可者。臣等愚幼見於書聞於師者如此，未敢必可行。伏望聖慈下臣此章，令諸老先生與左丞王贊善等商議條奏施行。臣等不勝至願。

元史
本傳

國學議

袁 楠

成周國學之制畧見于大司樂其遺禮可法者見于文王世子三代而上詳莫得聞焉。漢武表

章六經興太學至後漢為尤盛唐制微附益之
而其制愈加詳密今可考也宋朝承唐之舊而
國學之制日隳至于紹興國學愈廢雖名三學
而國學非真國子矣夫所謂三舍法者崇寧宣
和之弊也至秦檜而復增之月書季考又甚于
唐明經帖括之弊唐楊綰嘗曰進士誦當代之
文而不通經史明經但記帖括或投牒自舉非
側席待賢之意宋之未造類不出此今科舉既

廢而國朝國學定制深有典學教胄子之古意
倘得如唐制五經各立博士俾之專治一經互
為問難以盡其義至于當世之要務則畧如宋
胡瑗立湖學之法如禮樂刑政兵農漕運河渠
等事亦朝夕誦習庶足以見經濟之實往者朱
子議貢舉法亦欲以經說會萃如詩則鄭氏歐
陽氏王氏呂氏書則孔氏蘇氏吳氏葉氏之類
先儒用心實欲見之行事自宋末年尊朱子之

學唇腐舌敝止於四書之註凡刑獄簿書金穀
戶口靡密出入皆以為俗吏而爭鄙斥清談危
坐卒至國亡而莫可救近者江南學校教法止
於四書髻覲諸生相師成風字義精熟蔑有遺
忘一有詰難則茫然不能以對又近於宋世之
未尚甚者知其學之不能通也於是大言以益
之議禮止於誠敬言樂止於中和其不涉史者
謂自漢而下皆霸道其能詞章也謂之玩物喪

志又以昔之大臣見於行事者皆本於節用而
愛人之一語功業之盛何所不可殊不知通達
之深者必悉天下之利害灌膏養根非終於六
經之格言不可也又古者教法春夏學干戈秋
冬學羽籥若射御書數皆得謂之學非若今所
謂而止儒者博而寡要故世嘗以儒詬誚由國
學而化成於天下將見儒者之用不可勝盡儒

何能以病於世哉

清容居士集

請作養人材以宏治道疏

葉李

臣欽觀先帝詔書當創業時軍務繁夥尚招致
士類今陛下混一區宇偃武修文可不作養人
材以宏治道各道儒學提舉及郡教授實風化
所係不宜罷請復立提舉司專提調學官課諸
生講明治道而上其成才者於太學以備錄用

凡儒戶徭役乞一切蠲免

元史
本傳

乞增廣國學生員狀畧

蘇天爵

昔者世祖既定中原肇新百度知為治必資於
賢者養賢必本於學宮至元七年初命中書左
丞許衡為國子祭酒以教公卿大夫之子弟是
時學徒未有定額其後政教既修學者寢廣迨
至仁宗增多至四百員然而近歲以來員額已
滿至使胄子無從進學殊非祖宗開設學校廣

育羣材之美意

蘇天爵集

明

論太學疏

李賢

竊惟太學者天下貢士所萃乃育賢成材之地
故天下之士所以賢所以材胥此焉出所以盛
所以衰胥此焉係然則生民之休戚風俗之美
惡國家之安危豈不皆闕于此哉洪惟太祖高
皇帝聖神文武平定天下定鼎金陵首崇是道
方是之時宮殿城池未盡完也百府諸司未盡
創也佛寺僧道未盡舉也乃建太學於國宏其

規模極其壯麗凡所以教士之法戒士之條居
士之所養士之具無不詳審周密完備又慮表
率之職實難其人務選天下學明行修望重海
內所向慕士大夫所依歸足以師表一代名蓋
一時者然後命為祭酒崇以師道以振文風以增
士氣其愛諸生如慈母之顧嬰兒貴之若席上
之珍恩惠極隆無以加尚於是天下之士入太
學者居無不正習無不端衣無不具食無不足

無饑寒之亂心無邪僻之墮行其所事者治禮
義明人倫窮修己治人之方務致君澤民之術
故當時賢才俊傑之士濟濟輩出布列中外大
綱一正萬目畢張自古太平之盛未能或之先
也易曰聖養賢以及萬民其斯之謂與永樂初
年駕臨北京太學之設因元之舊凡百規制未
暇增新洪熙宣德以來因仍未舉至其教戒居
養之道頽然廢弛不遑介意師儒之職率皆庸

常學行荒疎無從矜式雖有遺規不過承虛名
為具文踵因循應故事而已於是天下之士入
太學者蔑教戒之嚴無居養之正置禮義為外
物輕廉恥如錙銖使其人居官不過志于富貴
而已尚何望其尊主庇民建功立業乎夫近朱
者赤近墨者黑居處所致無怪其然也嗚呼天
下之士修之于庠序壞之于太學賈誼所謂可
為太息者也今陛下春秋鼎盛續成大統凡一

舉措不可不慎舉所當舉則天下之人莫不懽
心措所不當措則天下之人莫不解體可不慎
哉我國家建都北京以來有廢弛而不舉有創
新而不措者所廢弛者莫甚于太學所創新者
莫多于佛寺舉措如是臣以為舛矣然成事不
說廢者當舉若重修太學極壯麗不過一佛寺
之所費況佛寺無益于朝廷而太學實關於治
體伏願皇上興廢舉墜之勅該部計料興工一

新太學作養人才重選師儒厚加眷注果能此
道將見數年之後賢才濟濟文風大振生民於
是乎安天下於是乎治我太祖養賢及民之效
復見于今日太平之盛不期自至而國家社稷
永享無窮之福矣臣性質凡陋無所知識偶有
所見豈敢隱默冒干天聽不勝惶汗之至

古襍
錄

請廣儲書籍議

邱濬

臣按宋朝以文為治而於書籍一事尤切用心

歷世相承率皆崇尚屢下詔書搜訪遺書或給以賞或賜以官凡可以得書者無不留意然猶慮其或有非常之變每卷皆有副本分貯各所是以真宗時崇文秘閣災而猶存太清樓之儲徽宗設官提舉募工繕寫一置宣和殿一置太清樓一置秘閣其寓意深矣我朝不專設管閣官凡前代所謂省監皆歸于翰林院專設官以司經籍圖書名曰典籍國家所有古今載籍皆

在所掌又於國子監設典籍一員司太學所有
經籍及板本之屬臣攷唐人謂人之博學曰行
秘書而宋之評詩者亦曰胸中無國子監不可
讀杜詩凡書史之有訛舛者必校正之以監本
則此二者乃自古貯經籍之所我朝館閣之職
凡前代所謂集賢院崇文院秘書省秘閣皆不
復置惟於翰林太學置此二員今翰林院祕藏
皆在文淵閣其典籍固有所職掌惟兩京太學

典籍幾於虛設臣聞永樂中太宗皇帝肇建北
京勅翰林院凡南京文淵閣所貯古今書籍自
一部至百部以上各取一部送京餘悉封識收
貯如故則是兩京皆有貯書也夫天下書盡歸
內府人家所有者蓋亦無多其間多有人家所
無者今幸猶存萬一有所疎失則永絕矣今國
家無事正天子崇儒右文之時忍使古聖賢垂
世立教之言載道為治之具傳之千百年者一

旦有意外之變或至今而盡泯豈不貽千古之
永嘆哉臣請勅內閣儒臣將兩京文淵閣書籍
凡有副本于南京內閣及南北兩監各分貯一
本其無副本者將本書發下兩監勅祭酒司業
行取監生鈔錄給與人匠紙筆責令各堂教官
校對不限年月陸續付本監典籍掌管如此則
一書而有數本藏貯又各異所永無疎失之虞

矣

文集

維持風教疏

謝鐸

竊惟人倫風教所先人倫不可以不明也臣願
正祀典以究明倫之實任途風教所繫任途不
可以不清也臣願重科貢以清入仕之途冗員
風教之濫冗員不可以不革也臣願革冗員以
重京府之制捷徑風教之羞捷徑不可以不塞
也臣願塞捷徑以澄國學之源臣愚近親禮部
尚書傅瀚等為地震事題准各該衙門條陳所

見臣知天下之事所當言者不止於此蓋凡政本之蠹蝕官師之黷濫生民之困苦軍士之疲困災異之迭見邊境之失寧是皆宗社安危之所關而朝廷宵旰所急者顧以啟沃論諫各有攸司而出位言高尤在所諱惟是四者闕風教學校之務也臣雖不才職專學校又豈容終于隱默而不一言之哉用是條列所見輒敢冒昧以陳惟聖明加之意焉天下幸甚斯文幸甚臣

不勝戰慄待罪之至一日正祀典以究明倫之
實臣愚竊惟學校之設皆所以明人倫也人倫
莫先于父子子雖齊聖不先父食奈何承祀襲
故以顏曾思三子配饗於上而其父則皆列祀
庶下冠履倒置有是理哉為今之計莫若于闕
里立廟祀叔梁紇而配以顏路曾皙孔鯉諸賢
如先儒能去非之說庶幾各全其尊而神靈安
妥矣人倫莫大于君臣殷之頑民猶不忍忘紂

奈何忘君事譬若吳澄者親為有宋之遺臣覲
然前元之官祿名節掃地何復言哉宜律以春
秋大義罷黜從祀以從莽大夫之列庶幾不掩
其惡而人心愜服也此前一事人雖屢言而未
見施行此後一事臣亦嘗言而未蒙俞允臣非
不知重複視縷言之誠為可恨特以每當奉祀
對越之際輒起頻蹙不安之心心所不安又不
得不發之言耳如蒙聖鑒乞勅禮部翰林院重

加考定使祀典以正人倫以明則所以維持風教者不淺二曰重科貢以清入仕之途臣愚竊惟科貢之設皆所以羅天下之賢才而用之也科舉一途雖稱得人奈何考試等官類皆御史方面之所辟召職分既卑學亦與稱恩之所加勢亦隨之於是又以外簾之官預定去取或者多為防閑而實則關節內外相應悉憑指麾而科舉之法日壞矣臣愚乞勅兩京大臣各舉部

屬等官素有文行者取自上裁每布政司特差
二員以為主考如往歲諸臣之所建白者庶幾
前弊稍革而真才亦可以漸得矣歲貢一途雖
近有之但近來提學等官類從姑息試廩之初
不以勢聽則以賄行不以濟貧則以優老及其
來貢之際又聽其自乞願為教職往往名為陞
考而實則虛文上下相蒙迄無可否而歲貢之
法益壞矣臣愚乞勅禮部將歲貢願授教職者

先送翰林院國子監按月考試期年之間擇其
果通三場者方許陞考授以職事庶幾前弊稍
革而教官亦不至于甚濫矣凡此二者揆之人
情格例未免窒碍難行臣竊反覆思之積弊之
深如此必得出自宸斷力加幹旋然後科貢可
重仕途可清而所以維持風教者不外是矣三
曰革冗員以從京府之制臣愚竊惟京國四方
之極天下所視以為準則者也竊見順天應天

實為京府大興宛平江寧上元四縣皆為附郭
見今學校之設惟二府有之而四縣皆未嘗有
蓋雖統於所屬轄實以府學之生徒悉皆四縣
之俊秀與其儲養之濫不若選擇之精之為愈
也不然豈以京國首善之地而惜此一學校之
官哉今天下附郡縣分不拘多寡俱各有學其
視京府實為冗濫臣愚請從順天應天之制凡
附郭一縣例增廩膳十名隨其縣之多寡以為

增益上以府縣教授兼領其事生員雖益而官不多庶幾冗員稍革而風教之責亦稍重矣臣亦熟知今之為官者類喜添設而難于裁減殊不知增一官則增一官之費寬一分則民受一分之賜天下冗員之可減者寧止是哉四曰塞捷徑以澄國學之源臣愚竊惟國學聚天下之英才而教育之皆所以備國家他日之任使也選之科貢猶恐未精近年以來大開捷徑如納

馬納粟之徒皆為其有資國用之缺殊不知得
其利者未什一而受其害者已千百此豈盛世
所宜有哉往年為因此輩不諳文理凡撥各衙
門寫本者俱以僱人艱難為辭日前流害其極
如此如蒙省納乞勅內府等衙門事例許今年
月相應者送科寫本亦令掛選出身庶幾怨嗟
少息而風教之地亦稍清矣臣固知國家養士
不厭其多但緊要所在恩倖之濫進昏曉之雜

處殊亦可憂然則捷徑之當塞者又寧止是

哉

枕溪
淨稿

孔廟從祀疏

程敏政

臣聞古聖王之治天下必以祀典為重所以崇
德報功而垂世教淑人心也故有功德於一時
者一時祀之更代則已有功德於一方者一方
祀之踰境則已然猶欲勸一時範一方而不敢
輕議焉況

先師孔子有功德於天下萬世天下祀之萬世祀之則其廟庭之間侑食之人豈可苟焉而已必得文與行兼名與實副有功于聖門而無疵於公議者庶足以稱崇德報功之意若非其人豈惟

先師臨之神不願歆將使典模範者莫知所教為弟子者莫知所學世教不明人心不淑通于天下而施及後世其為關係豈特一時一方之可

比哉適者言官欲出

文廟從祀諸賢之有罪者詔禮部集議臣愚亦在
預議之列疑其所言尚有未盡而議者相持憚
於改作臣考之於書揆之于心不敢妄為異同
謹畫一條陳上瀆聖覽伏乞皇上丕顯文謨主
張斯道仍下集議采而行之一洗前代相沿之
陋習永為百世可遵之典使世教有興起之益
人心得趨向之公其於治道未為無補一唐貞

觀三十一年始以左丘明等二十二人從祀

孔子廟庭蓋當時聖學不明議者無識謂釋奠先
師如詩有毛公禮有高堂生書有伏生之類遂
為專門訓詁之學為得聖道之傳而併及馬融
等行之至今誠不可不考其行之得失與義之
可否而釐正於大明有道之世也臣考歷代正
史馬融初應鄧騭之召為祕書歷官南郡太守
以貪濁免官髡徙朔方自刺不殊又不拘儒者

之節前授生徒後列女樂為梁冀草奏殺忠臣
李固作西第頌以美冀為正直所羞即是觀之
則衆醜備於一身五經為之掃地後世乃以其
空言目為經師使侑坐于

孔子之庭臣不知其何說也劉向初以獻賦進喜
誦神仙方術嘗上言黃金可成鑄作不驗下吏
當死其兄陽城侯救之獲免所著洪範五行傳
最為舛駁使箕子經世之微言流為陰陽術家

之小技賈逵以獻頌為郎不修小節專一附會
圖讖以致貴顯蓋左道亂政之人也王弼與何
宴倡為清談所註易專祖老莊而范甯追究晉
室之亂以為王何之罪深于桀紂何休則止有
春秋解詁一書黜周王魯又註風角等書班之
於孝經論語蓋異端邪說之流也戴聖為九江
太守治行多不法懼何武劾之而自免後為博
士毀武于朝及子賓客為盜繫獄而武平心決

之得免則又造謝不慙先儒謂聖禮家之宗而
身為賊吏子為賊徒可為世鑒王肅在魏以女
適司馬昭是時昭篡魏之勢已成肅為世臣封
蘭陵侯官至中領軍乃坐觀成敗及母邱儉起
兵討賊又為司馬師畫策以濟其惡若好佞已
乃其過之小者杜預所著止有左氏經傳集解
其大節亦無可稱如守襄陽則數饋遺洛中貴
要給人曰懼其為害耳非以求益也伐吳之際

因斫瘿之譏盡殺江陵之人以吏則不廉以將則不義凡此諸人其於名教得罪非小而議者謂能守其遺經轉相授受以待後學不為無功臣竊以為不然夫守其遺經若左邱明公羊高穀梁赤之于春秋伏生孔安國之于書毛萇之于詩高堂生之于儀禮后蒼之于禮記杜子春之于周禮可以當之蓋秦火之後惟易以卜筮僅存而餘經非此九人則幾乎熄此其功之不

可泯者以之從祀可也若融等不過訓詁此九人所傳者耳況其書行于唐唐姑以備經師之數祀之今當理學大明之後易用程朱詩用朱子書用蔡氏春秋用胡氏又何取于漢魏以來駁而不正之人使安享天下之祀哉夫所以祀之者非徒使學者誦其詩讀其書將識其人而使之尚友也臣恐學者習其訓詁之文于身心未必有補而考其奸諂淫邪貪墨怪妄之迹將

自甘於效尤之地曰先賢亦若此哉其禍儒害
道將有不可勝言者矣至于鄭衆盧植鄭元服
虔范甯五人雖若無過然其所行亦未能以窺
聖門所著亦未能以發聖學若五人者得預從
祀則漢唐以來當預者尚多臣愚乞將戴聖劉
向賈逵馬融何休王肅王弼杜預八人禡爵罷
祀鄭衆盧植鄭元服虔范甯五人各祀于其鄉
后蒼在漢初說禮數萬言號后氏曲臺記戴聖

等皆受其業蓋今禮記之書非后氏則不傳于世矣乞加封爵與左邱明等一體從祀則偽儒免欺世之名賢者受專門之祀而情文兩得矣

一

孔子弟子見于家語自顏回而下七十六人家語之書出於孔氏當得其實而司馬遷史記所載多公伯寮秦冉顏何三人文翁成都廟壁所畫又多蘧瑗林放申振三人先儒謂後人以所見

增益殆未可據臣考宋邢昺論語注疏申枨

孔子弟子在家語作申續史記作申黨其實一人也今廟庭從祀封文登侯在東廡申黨封臨川侯在西廡重複無稽一至于此且公伯寮愬子路以阻

孔子乃聖門之蟲豸而

孔子稱瑗為夫子決非及門之士林放雖嘗問禮然家語史記邢昺注疏朱子集註俱不載諸弟

子之列秦冉顏何疑亦為字畫相近之訛如申
棖申黨者但不可考耳臣愚以為申棖申黨位
號宜存其一公伯寮秦冉顏何遽瑗林放五人
既不載於家語七十子之數宜罷其祀若瑗放
二人不可無祀則乞祀瑗於衛祀放于魯或附
祭于本處鄉賢祠仍其舊爵以見優崇賢者之
意亦庶乎其名實相符而不舛于禮也一洪武
二十九年行人司司副楊砥建議請黜揚雄追

宗仲舒太祖高皇帝嘉納其言而行之主張斯道以淑人心可謂大矣然荀況揚雄實相伯仲而況以性為惡以禮為偽以子思孟子為亂天下以子張子夏子游為賤儒故程子有荀卿過多揚雄過少之說今言者欲併黜況之祀宜也然臣竊以為漢儒莫若董仲舒唐儒莫若韓退之而尚有可議者王通是也通之言行先儒之論已多大約以為僭經而不得比于董韓云爾臣

請斷之以程朱之說程子曰王通隱德君子也
論其粹處殆非荀揚所及若續經之類皆非其
作然則程子豈私于通哉正因其言之粹而知
其非僭經之人耳朱子曰文中子論治體處高
似仲舒而本領不及爽似仲舒而純不及又曰
韓子原道諸篇若非通所及者然不免文士之
習利達之求若覽古今之變措諸事業恐未若
通之精到懇惻而有條理也至于河汾師道之

立出於魏晉佛老之餘迨今人以為盛則固豪
傑之士也今董韓並列從祀而通不預疑為闕
典臣又按宋儒自周子以下九人同列從祀而
尚有可疑者胡瑗是也瑗之言行先儒之論甚
詳大約以為少著述而不得比于濂洛云爾臣
亦斷之以程朱之說程子看詳學記曰宜建尊
賢堂以延天下道德之士如胡瑗張載邵雍使
學者得以矜式朱子小學書亦備載瑗事以為

百世之法臣以為自秦漢以來師道之立未有
過瑗者矧程子於瑗之生也欲致之與張邵並
居于聖賢之堂其沒也乃不得與張邵並侑於
宣聖之廟其為闕典甚矣況宋端平二年議增十
賢從祀以瑗與焉若謂瑗無著述之功則元之
許衡亦無著述但以身教之懿與瑗相望誠有
不可偏廢者考之禮有道有德施教于學者死
則為樂祖祭于贍宗鄉先生歿則祭于社若通

瑗兩人師道百世如新得加封爵使與衡同列
祀于學宮最得禮意一自唐宋以來以顏子
曾子子思孟子配享坐堂上而顏子之父無繇
曾子之父點子思之父鯉皆坐廡下考之禮子
雖齊聖不先父食而三代之學皆所以明人倫
也夫

孔子之所為教與諸弟子之所以為學者不過明
此而已今乃使子坐於上父坐於下豈禮也哉

若以為此乃論傳道之功則自古及今未有外人倫而言道者縱出於後世之尊崇非諸賢之本意臣恐諸賢於冥冥之中必有不安於心而不敢享非禮之祀者臣考之元至順三年嘗封顏無繇祀國公謚文裕孟子之父孟孫氏亦嘗封邾國公臣愚乞下有司於各處廟學如鄉賢祠之制別立一祠中祀啟聖王以祀國公顏無繇萊蕪侯曾點泗水侯孔鯉邾國公孟孫氏配

享庶不失以禮尊奉聖賢之意臣又竊觀聖學
失傳千五百年至程朱出而後孟氏之統始續
則程朱之先亦不可缺况程子之父大中大夫
封永年伯程珦首識濂溪周子於屬掾之中薦
以自代而又使二子從游朱子之父韋齋先生
追謚獻靖公朱松臨沒之時以朱子託其友籍
溪胡氏而得程氏之學珦以不附王安石新法
退居於洛松以不附秦檜和議奉祠於閩其歷

官行已俱有稱述臣愚乞將永年伯程珦獻靖
公朱松從祀啟聖王使學者知道學之傳有開
必先明倫之義不為虛文矣

篁墩集

龜山先生從祀議

程敏政

謹案諸儒從祀于

孔門者非有功于斯道不可然道非後學所易知
也必取證于大儒之說斯可以合人心之公竊
考程氏遺書及朱子伊洛淵源錄所載龜山楊

氏行狀墓誌碑文俱稱其造養深遠踐履純固
溫然無疾言遽色與明道程子相似方其學成
而歸程子目送之曰吾道南矣然則是道也豈
易言哉自兩程子嗣孔孟不傳之統及門之士
得以道見許者龜山一人而已蓋龜山一傳為
豫章羅氏再傳為延平李氏以授朱子號為正
宗文定胡氏親承指授而春秋之傳作南軒張
氏上泝淵源而太極之義闡心學所傳悉本伊

洛使天下之人曉然知虛寂之非道訓詁之非
學詞華之非藝龜山傳道之功不可誣矣崇宣
之世京黼柄國躋王安石於配享位次孟子而
頌其新經以取士士尊王安石為聖人不復知
有

孔子誦新經為聖言不復知有古訓僭聖叛經凡
數十年龜山入朝首請黜其配享不令廁

宣聖之廟廷廢其新經不令蠹學者之心術又請

罷綱運以收人心斥和議以張國勢竄權臣以
正邦憲培主德以崇治本竝議讜言雖不盡用
然使天下之人知邪說之當息誠行之當距淫
詞之當放則龜山衛道之功亦不可掩或有疑
其出處之際而少其著述之功則亦有可言者
朱子謂龜山之出惟胡文定公之言最公曰當
時若聽用決須救得一半而文定亦曰蔡氏焉
能挽之然則以出處見疑者未考之故也龜山

值洛學黨禁之餘指示學者以大本所在體驗之功轉相授受而朱子得聞其指訣則見于何鎬之書朱子于理一分殊之論稱其年高德盛而所見益精則見于西銘之跋要之無龜山則無朱子而龜山之道非知德者殆未可輕議然則以著述見少者亦未考之過也又按元史至正二十一年因杭州路照磨胡瑜建言已將龜山與延平李氏文定胡氏九峯蔡氏西山真氏

俱加封爵列從祀以世變不及遍行天下此殆
近于禮所謂有其舉之莫敢廢者然則親講于
龜山若文定私淑于龜山若朱張咸在侑食而
近私淑于朱子若蔡真遠私淑于朱子若許吳
亦在侑食獨其師有傳道衛道之功可以繼往
開來抑邪興正者反不與焉揆之人心誠為闕
典考大儒之定論參前代之過失實伸弟子從
師之義慰後學向道之心以龜山躋于從祀直

合公言謹議

同上

聖駕臨幸大學謝表

林文俊

伏以典禮更新百代仰大君之有作辟雍臨幸
四方占泰運之方隆載舉曠儀聿先舊典懽均
朝野慶洽天人茲蓋伏遇皇帝陛下聖由天縱
德與日新彝倫叙而五典以惇禮樂興而百度
咸正況茲首善尤在留神默契聖心大祛俗見
謂

孔子稱王本非禮宜正

先師之名陋元人塑像為不經特遵皇祖之制別

祠

啟聖聿明父子之倫配食先賢盡去公侯之號禮

無僭瀆道益尊崇顧茲典之鼎新煩至尊以賁

重當薄海同文之日適踐祚一紀之初乃涓令

辰爰修盛事六龍捧御遠戾止于膠庠萬乘執

圭親奠釋于

先聖崇儒重道稽古誦經喜溢章縫光流簡冊執
豆籩以奔走乃有三氏之子孫園橋門而聽觀
奚止六館之英俊瞻威顏于咫尺奉法語之丁
寧建皇極以敷言斯其至矣觀人文以成化是
之謂乎臣等職忝師儒躬逢盛美幸覩大人之
虎變願先多士以駭奔賜坐而講易書覺叨榮
之已過教人必先忠孝誓圖報於將來伏願配
乎天配乎地皇朝綿一統之圖作之君作之師

天子介萬年之壽

途中申明學規事

湛若水

臣惟太學賢關之地祭酒風教之首苟非德行
道藝卓為儒宗則無以造就人才以輔聖治顧
臣何人何以堪此拜命以來夙夜兢惕懼不克
稱以負大戾茫乎若涉淵水罔知津涯悵乎若
適遠道罔知要路且行且思求得其道及取監
誌反覆讀之乃見聖祖神宗睿諭良規浩浩乎

其渾然示人約矣秩秩乎其燦然示人博矣如天之無不覆如地之無不載引而伸之觸類而長之以言乎教學之事備矣諸所見行有不容贅至于聖諭淵深不無未發之蘊良規寢久容有玩弛之虞臣伏覩求言之詔敢陳一得之愚謹條六事上聞一日推聖學以明道衍臣伏覩洪武十五年二月聖祖勅諭國學師徒有曰古今賢能首以學為本次特操持輔弼其所學斯

二事既行則善名于兩間矣臣仰見聖祖之學
與堯舜之精一

孔子之博約傳說告高宗學古知行之說異世同
符蓋學也者知也操持也者行也知以覺之行
以恒之聖學無餘蘊矣又本年六月新建國學
成勅太學生有曰致師于是來生徒以受業期
在育君子必履

仲尼之道以助後嗣共安天下蒼生今師徒皆至

若不勅以學道之志明以亂常之憲則恐養非君子用非賢人臣又仰見大哉皇言實開一代道學之源而太宗丈皇帝幸學勅諭亦稱太祖御筵講書守帝王之心法繼聖賢之道學臣竊惟聖祖之所謂道學者其志在於謙柔恭謹其道在於明倫理物其實在於孝弟忠信其用在於開物成務其蘊在於聖經賢傳其踐履在於誠敬篤實由鄉人而可至於聖人之道平易明

白非有索隱行怪高遠難稽離於日用之常以
為道也近時士異其習道德不一而風俗不同
辭華之士類誓守禮之人雖有後輩萌蘖之時
生不能勝夫風雨之摧折殊不知祖宗之重道
學如此蓋遠宗先王非道不學非道不用之盛
心也臣今論學或恐無徵不信請得以同司業
率監丞博士六堂教官令諸生欽服聖訓以道
學為標的以知行為工夫以文藝為華彩以事

業為結果如木樹之有根本而華實乃成則所
養所用皆君子賢才昌而天下安矣一曰示大
公以孚生徒臣伏覩正統五年六月二十四日
英宗皇帝勅諭北京國子監祭酒有曰南北諸
生貧富不齊入監或一月或數月或一年二年
即得撥諸司辦事亦有遂出身者利之能移人
也有坐監十餘年貧不得出身使之艱難嗟怨
其寧忍乎又與諸司交通凡辦事者一人有缺

干求發補簡帖動致一二十紙有勢力者終得之借曰為勢所逼何不執以奏師之所行如此何以表勵學者又曰撥歷事者必依資次不許攬越辦事者亦須公當不許徇私但有私相囑託輒便聽從不奏聞者必罪不恕臣謹因聖諭而推之撥歷一事為務甚小似無關於師道而師道之行不行於此焉係夫師道之不行由於生徒心志之不孚奔競之不息夫心志不孚則

言語不信言語不信則教訓不行奔競不息則禮讓不興禮讓不興則教化不浹二者師道之疚也其故由於祭酒撥歷自專而未嘗示以大公之法也故人得以私干之士得以私疑之此心志不孚奔競之所由起也臣請於撥歷之時祭酒同司業召監丞博士六堂教官會集公所公同序撥先於諸生到監之日不徒序於壁而祭酒司業以至六堂教官又人各書簿以憑至

日序撥如有請託干求者各官即密書於各簿
本名之下監丞又明書於紀過之簿以為罰甚
則欽依勅諭執奏是所謂示以大公之法也如
此則心志孚奔競息而教化行矣一曰立隣朋
以勵德業臣竊惟生員坐堂講習有相親薰陶
之義已有定規退或放逸常情有所不免臣更
欲於各生居同號舍者簽立比隣十人為朋置
為簿籍必使退堂之後出入相友德業相師作

事相法容止相觀進退相度疾病相恤有無相
濟過失相規一人過惡發露九人連坐罰跪一
人為善卓異九人連賞如此則進有公堂退有
私居無非漸摩夾持之益若久之士習當有
變化一日視生徒以恤病苦臣伏覩洪武十八
年我聖祖頒降勅諭內一款餓死生員其罪當
坐親教之師金文徵誣言祭酒餓死監生祭酒
本提大綱生員有疾親教之師必當存問飲食

必書於簿疾重者以文上告藥餌尤經有司失
於存問飲食藥餌不節或有傷生者罪坐親教
臣仰見聖祖愛養諸生之盛典而尤欲寬貸崇
重祭酒之盛心也竊惟民胞物與痛癢相關况
祭酒於諸生恩義兼重豈敢托于不知故公堂
坐受請問跪拜義分之嚴也退而開諭委曲疾
病存問恩禮之盡也二者並行而不悖然後師
徒交孚而教訓可行臣欲欽依聖諭生員有疾

令親教先往問之甚則司業祭酒當臨視之軫
其飲食節其醫藥不幸而死則臨歛之如例給
具若親教不往而祭酒聞知亦當率先自往以
愧其心不嫌於違道干譽一曰慎升第以立勸
懲臣伏覩洪武十六年學規內一款定生員三
等高下定六堂師範高下又曰凡生員通四書
未通經者居正義崇志廣業堂一年之上文理
條暢者許陞修道誠心堂坐堂一年半之上經

史兼通文理俱優者陞率性堂又以坐堂實日
多寡而陞外此又有積分之法至為精密臣竊
惟為師長者所以激勵人心鼓舞士風不可無
進退抑揚以寓勸懲此聖祖所以立三等之法
也近來雖有季考專以文藝而勤惰賢愚混而
不分臣欲於已撥六堂者雖不能一旦更張而
於諸生或季考其文藝以驗其心之精粗或於
其坐堂踈數以察其學之勤惰或庶其行義觀

其動止聽其講論以定其人之賢否而遞陞之
其上等者堂長友長侍直有缺亦同司業博士
六堂教官公推選之而其撥歷遲速一依序壁
先後次第如此則聖祖之良規不廢而人心亦
可勸懲士風庶乎可鼓動矣一日署長材以備
器使臣竊謂

孔門之教同志於仁四科之賢因性成就故果儒
胡瑗教授亦分經義治事齋隨其材而造之也

其教之必以德行道藝為本不必恃時反古舉業德行合為一事凡其讀書作文就宜收斂隨處體認不至喪志以此立心涵養德性蘊之為德行發之為事業出之於言詞皆是一貫此所謂二業合一之說也及其成也人各有長如四科之品其法每三歲各學之長副會府州縣之正官即其所長而考核之為二等之法曰德行材能某長某事如德行則指為孝弟忠信之實

材能則別其水利兵農之長署於各名之下如
今內外官府考語之制以上於提學提學官又
集一等之長而考核之各署其德行材能如各
學之制及有中舉歲貢即以所署名下行能連
達於禮部禮部以下兩監其舉人監生之在兩
監一年者祭酒司業據提學之所署又會監丞
六堂之官而考核之各署其德行材能與監學
應者隨其材德而器用之不以枉其實雖終身

遷秩而所署隨之如脚色之制署不尚實賄而容私後有敗露者坐其署主若所署有功德顯卓者亦連賞之如是則所用必所養所養必所用用得其賢賢得其用此不違今日科舉之制而兼德行道藝之教不違今日考察之法而寫鄉舉里選之意異時稍漸復古亦擴充此意而盡之如此則賢才自興善政自舉風俗自淳其視時之徒以舉業進身既入仕途無所用之判

為二段殊昧祖宗立法之意者其為得失大有

徑庭矣

本集

選師儒以敦教化疏

謝存儒

臣聞國家之休戚由風俗之盛衰闕學校之崇
替故古之明君知其弊之所由振其機括以轉
移之則俗尚正而治功可舉矣臣竊見數年之
間上下臣僚廉恥道喪名節不立以全身保位
為賢以竭忠盡節為愚以峻刺集事為才以擊

拳曲踈為恭假公平而飾詐緣義類而徇私祕
貪奸以示廉籍威權而毒衆財賄交通於豪門
虛偽矯罔於君上捷給者與之為能端莊者嫉
之為僻禮義銷亡風俗頽敝長此不革國何以
昌凡此皆今日學校之政不修道義之實不著
也夫太學者乃天下首善之地而風教之所由
興近世師儒儀範不立開導無方惟知勾校簿
書不復專精德藝考課業仍其抄錄計積分准

其班資監生則苟度歲時游玩博奕其幸而以
學業自勤者則又揣摩剽竊以應時用僻裂輕
艷理義支離不過假此以階顯榮其於立身行
政曾未推行夫古之為學也將以正其性行明
其經術而成其材能以待舉任於上也故當其
時為士者以廉恥節義自著禮遜公正自植或
臨危瀕死甘蹈其節而不知悔者蓋其學術素
明而不疑亂於利害之私也今幸聖明燭知其

習俗之弊特命憲臣嚴加考選以新厥服此正
善惡邪正之幾安危治亂之由也臣愚以為宜
因品擇之餘敷求碩儒闡明正學開以仁義禮
樂之實勵以忠節廉恥之道以成周教人之法
為課習登進之規必經明行修材能可任然後
辨論其等差而命之秩或參以宋儒胡瑗教學
蘓州則程立經義時務二齋使各以其性之相
近俾人之勉修學業朝夕講明月朔則稽其勤

情召而教之歲終則大會僚屬考其學行之修
明者獎勸激勵之否則切責之三歲則論其賢
者能者於朝以備任使學荒以虧者則罷歸而
斥之從役又以其法頒之天下使督學憲臣一
以是為規則勿得即其浮詞而信其實行有經
術疏通而蔑棄禮義者則罷斥之不齒其行檢
端莊而學術疎淺者少待再校而論致太學以
別議其任其分教天下須擇學術通明性行端

潔者以典領之不使老鈍無恥者叅雜其間以
壞士習如此則風俗自正而人勉於士君子之
行平居則有羔羊正直之節立朝則有正色犯
顏之風臨難則有仗節死義之士禮義修行而
民俗丕變太平之風此其基也

經世
編

乞定真儒從祀疏

魏時亮

欽惟國家道化旁洽迄今逾二百年士之生於
其間遵道遵路淪肌浹髓固無非間出之英若

求其足以克光昭代無忝人文在

孔門則師心顏孟之傳在宋代可屈指周程之列
實亦不數人耳是數人者天實生之所以助我
國家之元化我明得之足以追躡前代之真儒
又今沒世既久聲實既孚遭逢明聖苟不一為
甄進表揚卒使聖門乏昭代之賢而國家虛崇
尚之典凡侑坐俎豆者徒以前代稱盛焉則聖
朝道化隱而不彰萬世人心將有不滿於今日

者矣蓋我皇上當重熙累洽之後值聖作物觀之初先朝所未舉者既有待於此時而新政所崇尚者又有闕於風教恭覩英廟新政命舉宋儒胡瑗蔡沈真德秀從祀

孔庭孝宗皇帝初年亦特命考正廟庭從祀逮我先皇帝廼復進歐陽修等數人無非以重道崇儒帝王首務然皆不及我朝者因先後儒臣沒俱未遠而先皇帝復有少俟將來之旨正留待

陛下以光今日之新政耳臣愚伏考理學名臣
名姓甚多均可師法若求其學有真得如臣所
謂師心顏孟屈指周程者惟三人為最著耳臣
伏見河東薛瑄餘姚王守仁近該言官題請從
祀該禮部覆議薛瑄則曰勵志聖賢之學修為
多實踐之功潛心濂洛之傳造詣得精微之蘊
意雖不專於註述而片言隻簡動示楷模心雖
不繫於事功而偉節恢猷皆可師法實稟乾坤

之間氣足稱昭代之真儒至于王守仁則曰質本超凡理由妙悟學以致良知為本獨觀性命之原教以勤講習為功善發聖賢之旨當時親炙者咸樂依歸迄今私淑者莫不尊信是亦百年之豪傑一代之儒宗也審如是則二臣顯昭代之人文真聖門之羽翼可以並列宋儒侑食孔廟蓋無疑矣獨有生於薛瑄之後而崛起守仁之先者臣又得一人焉臣愚謹案嶺海陳獻章

志聖學於壯年會心體於自得舞雩默契見勿
忘勿助之真萬古日星沛仁義江河之用學已
造於至樂誠已足以動人故克養完粹來彭韶
之薦章忠孝具陳動憲皇之親覽羅倫定交賀
欽師事在姜麟則稱為活孟子在章懋則稱為
第一流迺若去支離而全不測之虛靈即日用
而見鳶魚之飛躍尤能迺邁與弼追躡濂溪是
以風動廣南師範天下有臣如此與薛瑄王守

仁後先相望焉信名世之大賢理學之深造聖
明涵濡之功至此可為甚盛而上天生材之美
至此可為獨優矣迺今薛瑄王守仁伏蒙聖旨
欽依下詹事府等衙門會議逮今數月回奏未
聞豈皇上崇儒之盛美可虛而二儒心得之真
傳可泯耶夫薛瑄已經昔時公議一考可知若
王守仁者破除俗學獨契本真悟

孔氏之微言發後賢之未發良知與性善同功求

仁與萬物為體雖其少年之豪邁有聞要亦橫
渠之臯比勇撤而顧可終掩之哉至於學守仁
者之謬則固非守仁之過矣顧道旁之舍成之
則難衆言之清宜折諸聖伏乞催集公議取自
聖裁但宜專責詹事府總集多官之論彙為一
帙進覽然後議事有綱復奏有日至於陳獻章
則素行毫無可訾而所學純乎自得仍乞勅令
一併將獻章學行撰擬以聞昔學士何文淵編

修某某等撰議大儒之學至今與大儒名論並
傳彼宋末陳光之禁萬世罪之於晦菴元定何
與焉故由今之世雖間有口談儒學而行不掩
言者然不可舉一廢百而盡疵天下之正學也
又不可由今議昔而並棄已往之真儒也昔人
謂讀書未到康成未敢高議漢儒若知道學聖
儒者苟非身與頡頏實難評議鄒智有言乾坤
誰執

仲尼權便敢刪從已酉年蓋謂獻章之詩無敢輕
意刪定而况三儒之學又誰敢輕意軒輊其間
乎倘蒙皇上軫念古今真儒難得此三儒者實
萬世光我國家人文之會務速集朝議斷自聖
心早正從祀之規大慰明時之望則上可彰道
化之隆下可開來學之盛前可紹往古之追崇
近可成聖朝之盛典而天下萬世人心鮮有不

心悅而誠服者矣

明奏疏
類抄

欽定國子監志卷五十五